

LEB ABIA A VÒRB

*Leb abia s **roat** van hèrz
as bermp abia s vaier en diar,*

*Leb abia s **bais** van bolkn
as plosn abia der bint en hor.*

*Leb abia s **grea'** van bòlt
as still ist abia de rua.*

*Leb abia s **gel** va de sunn
as lòcht abia a kinn pet de gutzeler*

*Leb abia s **plob** van bòsser
as laft ont lèrmpt abia s tol no en reng*

*Leb en òlla de vòrm
as du kennst ver za varmen s dai' lem.*

Gèltsgott mama

*Gèltsgott mama ver en lem as du hòst mer gem,
ver sèll as i pin,
ver sèll as du hòst mer galeart,
ver de vert as du hòst mer kein va jo ont
ver de vert as du hòst mer gamiast song va na.*

*Du pist òlbe glaim en miar aa benn i nèt sich de.
De dai' hònt ist òlbe paroatet za pòcken me benn i vòll,
benn e noat hom,
offet ist s dai' hèrz as hòt me gearn òlbe.*

*Sai mama ist schea' ont hòrt aa
lai iaz hon e s verstònnen,
iaz as mama pin e i aa.*

Gèltsgott mama

A roas lonk a jor

*A'ne GENNER vonk men nèt u
der heart aa ist òlbe u*

*Der HOURNENG ist kurz ont kontent
de bètsche paroaatn der testament*

*Der dritte ist der MERZ
de sunn pariart nou a kloa'na kerz*

*OBEREL va lenges schmekt
de zaitloasn hom se augabekt*

*MOI s mu'net va de Madonna ist, petn ont singen liadler
kan kapitell piabler ont diarndler*

*En PROCHET lòk men aus de kia
ont men geat en gortn en òlla de vria*

*No en heib en HEIBEGER gea't men
ober men s renk mear mia teat men*

*En AGEST ist schea' bòrm
de geas as de bisn kemmen gabiss nèt òrm*

*En LEISTAGEST ist zait za grom de ruam
ont za paroaatn sa en kèlder hoa'm*

*En SCHANMIKEAL der krumer hòt de kraks paroaatet schoa'
en Tirol ont Osterraich pet an pòck gabiss nèt kloa'*

*ÒLDERHAIENG miast men en de òrmen sealn denken
plea'der ont kerzn en de toatn schenken*

*SCHANTONDERER pet de stela en leste to
s jor ist aus ont ber sai' bider do*